

I whakamarama a Ned Parata i nga ahuatanga mo te haere nei. Kaore ano kia kowhiritia nga tangata mo te haere, engari kei te tirohia nga tamariki maia ki te purei o tena iwi o tena iwi. Ko te hiahia kia rite katoa te rato o nga iwi o Aotearoa me te Waipounamu ki te tiimi ki haere nei. Otira ko te mea e whaia nei ko nga tamariki tino toa mo te mahi whutu paoro i roto i o tatou iwi katoa.

I whakaatu a Parata ko nga raruraru katoa mo nga tikiti mo te haerenga atu me te hokinga mai, kei nga ropu o Wiwi. Engari kaore he utu mo nga tamariki nei, ara he moni iti rawa nei e whakaritea ana hei hoko hikareti nei, ka mutu. Kaore hoki e whakaaetia e nga ture o te Rakapi Nuiana, kia utua nga tangata pahi. Ki te utua ana, kua taka ki waho o te Rakapi. Noreira te kaha o te inoi a te komiti, kia manaakitia tene haere e te iwi Maori mai tonu. Ko te hiahia o te komiti kia kohia mai he moni e tena iwi, e tena iwi hei awbina i a tatou tamariki. I whakamarama ano a Parata, ka rite nga purei ki Wiwi, ka haere ki Ingarangi. Ki te whai hereni ratou, tera te ropu Maori nei e hoki mai ma Canada, ma Amerika kia tae ai ki roto hoki i era iwi nunui o te ao whakakitekite ai i nga kaha o te iwi Maori.

Ka mutu nga whakamarama ka whakariterite te komiti i nga huarahi e kitea ai he moni hei awbina i a tatou tamariki.

Whakaritea ana he taake rangatira ki tena takiwa ki tena takiwa. Ma koutou e nga rangatira e manaaki mai, kia ora tonu koutou. Otira ki te kore e taea e koutou, ki te whakahe ranei koutou ki te taake mo koutou, kaati, waiho noake, kaore hoki he ture mo tenei whakahau e manae ai tatou, engari kei te kimi tahi tatou i te huarahi o te ora me te haere rangatira o a tatou tamariki. Ko te wahi ka taea e koutou, tukuna mai. Kua rite i te komiti ko a tatou moni me tuku katoa atu ki te Heikeretari, ara me penei a waho o te whare-puka-puka o te waea ranei.

KINGI TAHIWI,

Native Department.

Wellington.

Heoi e nga iwi kia ora koutou me a tatou tamariki. Kia whiti te ra ki rangi ki a tatou tamariki. "He huruhuru te manu ka rere."

Whakahaeretia mai a koutou rarangi koha, a koutou whutu-paoro, nga kanikani, nga concert me era atu tikanga, kia rite ai te wahi ma tena ma tena.

Kei waenganui o nga ra o Hurae ka tere a koutou tamariki.